



28. januar 2015

UPA 2015/111

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Qanoq iliorluta meeqqat pitsaanerusemumik angerlarsimaffiup avataanut inissitagut nammineersinnaanissaannut ikiorsersinnaanerivut pillugu apeqquteqaat aallaavigalugu oqallisissiaq.

(Inatsisartunut ilaasortaq Agathe Fontain, Inuit Ataqatigiit)

Meeqqat inuusuttuaqqallu pisortat namminersortullumi angerlarsimaffiutaannut inissitat siunertaqartussaapput inuunermiini pitsaanerpaamik ingerlaqqinnissaannut.

Tamannalumi anguniarlugu kommunit inissiisut inatsisitigut piumaffigineqartarput inissiinermiit siunissaq isigalugu periusissamik allataqariissasut.

Taamaakkaluortoq malittarisassat malinneqanngitsoortuaput.

Takujalerpagut meeqqat inissiiffinni assigiinngitsuniit assut pissusissaaleqisartut iliuusissaminnik. Inuusuttuaqqat ilaat atuartussaallutik sivisuumik atuangitsoortarput, ilaat suliffimmik sungiusarniarlutik aqunneqannginneq pissutaalluni uniinartariaqartarput. Tamatuma kinguneraa pisortat angerlarsimaffiini inuusuttuaqqat susassaaleqillutik inoorusaalersarnerat.

Qularutissaanngilaq sulisut sapinngisartik tamaat ilungersortut. Paaqqutariniagaalli ima innarlerneqartigisarsimapput nalinginnaasumik perorsaaneq aqqutigalugu killikkuminaassinnaallutik.

Tamakku ilisimariikkatta pingaassusiat ersersinneqarpoq nalunaarusiami taaguutilimmi: "Siusinaarluni iliuuseqarnissaq pingaaruteqarluinnartuusoq." Tassaasorlu pingaartillugu ingerlanneqartussa.

Ullumikkut inissinneqarsimasut inuunerat kingumut qiviarfigigaanni, tamatigunngajaavik takuneqarsinnaavoq amerlasuut naartuuneraniilli iliuuseqarfigisimasassaagaluartut. Siusinaarlunilu iliuuseqarfigisimagaanni ullumikkut ajornartorsiutaasut minneerakasiussagaluartut.

Ullumikkulliuna qanoq iliorniartugut? Pilersaarutini kommunit allattarnissaat piumasaqaataasoq naammassineqarneq ajorpoq. Tamanna ilisimavarput. Kommuunillu sulisuisa suliasaqarpallaarnerujussuat peqqutaqaataavoq. Meeqqanut inuusuttuaqqanullu inatsisitigut piumasaqaatigut sukaterutsigit ilumut ajornartorsiut qaangiutissava?

Ulloq unnuarlu angerlarsimaffiit, meeqqat inuusuttullu ataasiakkaarlugit periusissaminnik allassimasunik malinnissinnaanerat, Namminersorlutik Oqartussat nalilersortartussaavaat. Qanoq iliuuseqartoqartarpa inuusuttuaqqanut siunertarisat malinneqarsinnaanngikkaangata? Soorlu meeqqat atuariinut, ilinniaqqinnernut sulinermulluunniit misiliinernut tunngatillugu.

Taamatuttaaq ulloq unnuarlu angerlarsimaffik siunertamisut ingerlanngippat, taava qanoq iliuuseqartoqartarpa? Ilaatigummi inissinneqarsimasut unnuarsuarmut aneersinnaasarput inissisimaffitsik sinittarfittut nerisarfittullu atuinnaarlugu. Atuassanatik, siunertalimmik iliuuseqarfigineqassanatik, suliffimmilluunniit sungiusarfissaminnik innersuunneqassanatik.

Kingunerisarpaa inuusuttunnguit akisussaaffimmik ilinniartinneqannginnerat. Inerillutik namminneq inuulernissamik tungaannut piareersarneqaratik.

Tamakkununnga ernumaammerneq piutillugu eqqaanngitsuugassaannngilaq Inatsisartuni akuereriikkat. Inuusuttut angerlarsimaffiup avataani ukiuni amerlasuuni inissisimanikut 18-inik ukioqalernerisa kingorna iliuusissat (efterværn) Sumut tamakku killippat? Qanoq iliuuseqartoqarpa 18-inik ukioqalereersimasut pakkersimaarniarlugit?